

## 秋詩四首

### 【秋初】

秋天總是恬恬仔來  
佇咱不知不覺中來矣(--ah)  
毋管前一工是大日頭  
是落雨天  
猶是做風颱  
伊攏會來  
來的時陣將思念恁(tshuā)來  
將鬱悶恁來  
予人佇秋天的時陣  
有真濟的心情  
會想起真濟平常時袂想著的代誌  
回憶起真濟過去的快樂時光  
甜甜的感覺嘛入去心肝底

### 【秋思】

秋天來矣  
人佇這個時陣  
定定有真濟思念的心情出現  
看著樹仔頂的樹葉落(lak)落來  
就想著離開咱身軀邊的人  
毋管伊是親人  
抑是捌愛過的人  
這種思念的心情親像海湧仝款  
一直一直衝入來我的腦海中  
嘛會思念起過去艱苦的代誌  
當我咧想的時  
愈想愈感覺悲傷  
那(ná)想目屎就那流落來矣

### 【秋景】

秋天來的時陣  
將樹仔的樹葉染色  
共綠色充滿活力的樹葉仔  
變成黃黃的金幣  
一粒一粒落佇塗跤  
樹仔佇這個時陣  
敢若變成劫富濟貧的義賊  
將偷來的金幣分予散赤的土地  
風嘛「hú-hú」咧吹  
親像代替土地對這個義賊說多謝  
秋天嘛咧無閒  
伊將這景象  
刺(tshiah)成美麗的畫面

### 【秋末】

秋天真緊就又閣欲走矣  
所有的小動物差不多攏將食物藏好勢矣  
因為個知影  
一个號做「寒人」的怪物欲來矣  
伊來的時陣  
會將秋天趕走  
會共食物食了  
秋天就欲結束矣  
思念的心嘛慢慢仔離開矣  
因為寒人將思念這個蠻皮囡仔關起來矣  
予思念這個囡仔  
無法度入來我的頭腦內面要  
到伊離開的時陣  
我才發現  
原來秋天閣偷偷仔走矣

### 創作理念

每當到了秋天的時候，常常有很多的想像及思念的心情進入我的腦海中，只是每當有這種想法時，我都不理會，這次雖然徵稿的時間不是秋天，但是秋天時來的靈感，卻一直留在我腦海裡直到現在，所以我就將這靈感，寫了下來，不只是為了抒發個人的情感，也是為了要將台語傳揚出去，讓更多的人知道，用台語寫的作品也是很美的作品。

### 余偉豪

中山醫學大學台灣語文學系

